



Aòraa no te tapati 7 no tiurai 1996 (tapati no te tatauro ninamu)

Taiòraa : Mataio 11, 25 - 30

Aòraa : Mataio 11, 28

«E haere **mai** outou ia ù nei, e te feia atoà i haa rahi, e tei teiaha i te hopoià, e naù outou e faaora...»

Ei orometua ite e te paari...

Te ite nei tatou ia letu, i roto i te tumu parau i faataahia no tatou i teie mahana, mai te hoè orometua-haapii te huru, o tei ite i roto i te parau no te haapiiraa i te taata, i te hoè tuhaa faufaa roa no te maitai o te nunaa. Ua ite atoà râ letu e, mai te mau faaineineraa atoà o te mau orometua-haapii i ô tatou nei i teie mahana, no taua toroà ra, e mea tià ia i te tino e hinaaro ra i te haapii i te taata i te ite e te paari. Eaha hoi ta te hoè orometua-haapii i ère i te ite e haapii atu i te hoè taata e hinaaro ra i te ite. E nahea hoi o ia i te haamaramarama i te taata mai te peu e, te ère ra o ia iho i te ite e te paari. E orometua-haapii râ letu tei i te ite e te paari, e tià ai ia na ia haapii e ia haamaramarama i te taata i haere mai i ta na haapiiraa. Areà râ taua ite ra e taua paari ra no na, e mea horoàhia mai ia e to na Metua, o ia i ore i faariro ia na mai te hoè taata paari, mai te hoè râ tamarii. E ere râ taua toroà ra no te titau i te faateiteiraa a te taata i te orometua-haapii, ia na râ tei titau i te orometua-haapii no taua toroà ra, ia maitai te nunaa.

... ei orometua marù atoà râ e te haèhaa...

Te haapāpū-atoà-hia ra i roto i ta tatou taiòraa no teie mahana i te taaèraa no letu i te tahi è atu mau orometua-haapii i to na anotau. E orometua-marù o ia areà te tahi atu mau orometua e feia irià ia e te ino tei ore i haamāmā i te hopoià a te taata. E mau rapi ratou tei faateitei ia ratou, i roto i te tiātuiriraa pāpū e, aita hoè mea e toe faahou ra ia ratou i te ite e i te haapii. Ua ite ratou i te auraa mau

no te Ture i vaihohia mai e to ratou mau tupuna i te anotau o Mote. E orometua e e rapi haèhaa râ letu tei hinaaro noa, no te hanahana o to na Metua e no te maitai o te nunaa, i te tauturu e i te haapiiraa a to na Metua. Aita te ite-ore o te nunaa i te auraa mau o te Ture i riro no taua mau orometua ra ei mauuiraa, ua riro râ te reira no letu ei peāpeāraa e ei manaōnaōraa. No reira, no te toroà-haapii, aita i ravai ia i noa te orometua i te ite e te paari, ia apiti-atoà-hia mai râ te reira i te marù e te haèhaa, mai tei itehia te reira i roto ia letu. Aita râ anei hoi taua poroiraa ra e moèhia ra i te feia atoà i pūpūhia ia ratou i teie mahana te toroà haapii.

... no te haapiiraa i te taata...

Te ite atoà nei râ tatou, i roto i ta tatou tumu parau no teie mahana, i te teiaha no te huru haapiiraa a te mau orometua-haapii i te anotau no letu. Aita ta ratou mau haapiiraa i aratai i te taata i roto i te iteraa i te Atua mai te hoè Metua, mai te hoè râ Haava tei moemoe noa i te hape o te taata no te faautuà ia na. Aita ta ratou mau haapiiraa i haafarerei i te taata i te hoè Atua tei here i te taata, i te hoè râ Atua irià tei opani i te taata ia ata, ia himene, ia āpa... Riro atura te Ture a te Atua, na roto i ta ratou huru haapiiraa, mai te hoè tuto ètaèta e mai te hoè hopoià teiaha o tei faatupu eiaha i te oaoa, i te peāpeā râ !

... eiaha i te hoè Ture tei faateiaha i te taata...

I tià mai ai letu no te haapāpū i ta na mau pipi e i te taata e, te Ture a to na Metua, e ere ia i te Ture no te haama-

taù e no te faautuà i te taata, no te faaora râ e no te paruru i te taata i mua i te mau tamataraa huru rau atoà no te oraraa. E Ture e e parau o tei faaite mai i te hohonu hau è no te aroha o te Atua i te taata o ta na i hamani, mai te metua e here nei e e poihere nei i ta na mau tamarii na roto i ta na mau haapiiraa e i ta na mau aòraa. E Ture tei hinaaro eiaha i te pohe o te taata, i te ora râ o te taata. E Ture eiaha no te faateiaha i te taata, no te haamāmā râ i te mau tuto e i te mau hopoià huru rau e amonoa-hia ra e taata i roto i to na oraraa.

... o tei haamāmā râ !

I taua feia ra, mai te mau tane e tae noa atu i te mau vahine, e feia āpī e aore ia e feia paari, e faateiaha-noahia ra e te mau tuto e te mau hopoià huru e faaino ra i te oraraa utuafare, i te tiātuiriraa i rotopū i te metua e i te mau tamarii e i rotopū i te Fatu ravehipa e te rave-hipa... te titau nei letu ia ratou ia tiāturi e ia haere atu ia na ra no te haamāmāraa ia ratou. Te ani nei letu ia ratou ia haere atu ia na ra no te haamāharaa i to ratou rohirohi i te mea e, i rapae atu ia na, aita e raveà e aita atoà e taata e vai ra no te tatara ia ratou i rapae i to ratou mau hepohepo... I parau ai letu ia ratou : « E haere mai outou ia ù nei, e te feia atoà i haa rahi, e tei teiaha i te hopoià, e na ù outou e faaora. A rave mai i ta ù tuto i nià ia outou, e ia haapiihia outou e au, te marù nei hoi au e te haèhaa o te aau : e e noa hoi te ora i to outou varua. Te marù nei hoi ta ù tuto e te māmā nei ta ù hopoià. Ia ora na.

Jacques Ihorai